



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

Tir Yimyim

tiryimyim@aolima

tir yimyim

TAPAK 7

Mizoram nung ak 276 süogo

Bendangleni vaccine aika yoker saka India nungerbo timtemer



VOL. XVIII NO. 175 (ADOK 175) DIMAPUR

KÜPTOKNÜ (SATURDAY)

RONGCHII (APRIL) 10, 2021

₹ 5.00

## Dimapur Airport nung tarur ajak tendangtsü

**Dimapur, April 9 (TYO):** April 6, 2021 nü High Powered Committee (HPC) on COVID-19-i Dimapur Airport nung tangalen nungi arur shia dak thermal screening asütsü telemetba agiogo.

India kübok state aika nung COVID-19 kanga menatepa aoba ajanga HPC-i iba telemetba agiogo.

Dimapur Airport nung District Task Forec (DTF)-i lemzüksüba teloktemi nisung ka Nagaland-i arutsü alia anogo asem tejaklen COVID-19 tendangdang negative

putetba report mesüra COVID-19 vaccine agiba osangtem metetpelatsü.

Parnokisa passenger tem nCOVIDNagaland Visitors App nung tenung zülüokba aser 'Self Declaration Form' agütsüba jangjateptsü.

April 5, 2021 nungi linük nung COVID-19 kanga putetba state 11- Maharashtra, Chhattisgarh, Karnataka, Kerala, Punjab, Tamil Nadu, Uttar Pradesh, Madhya Pradesh, Gujarat, Rajasthan aser Delhi nungi arurtem dak temolung talila agütsütsü.

## Dimapur nung dokan kiburtemi SOPs benshitsu

**Dimapur, April 9 (TYO):** Linük nung COVID-19 kanga putetba nung ajemdaker Dimapur Municipal Council (DMC)-i dokan kiburtem aser shishilembar ajak dang COVID-19 inyakym sülen anidaksü metetdaksüogo.

Dimapur nung dokan kiburtem aser shishilembar

face mask enoktsüla, hand sanitizers amshitsu aser nisung o nisung tsingda tepila ayutsüla, ta DMC Administrator Albert Ezung-i sangdong ka nung ashi.

Paisa public dang COVID-19 nungi jenbua alitsü inyakym lateta aliba sülen anidaksü mepishia metetdaksüogo.

## Dimapur nung COVID-19 atema senden amen

**Dimapur, April 9 (TYO):** Hokolbarnü Dimapur Deputy Commissioner aser Dimapur District Task Force chairman Rajesh Soundararajan-i senden ka ayonga menogo.

Senden nung Dimapur District Task Force for COVID 19 aser District Task Force for COVID 19 vaccination züngsemtem aden.

Nagaland nung nisung aika dak Covid aliba puteter aser anungji Dimapur district nung Covid 19 wara tanabuba anema renema alitsüla, ta Dimapur DC-i ashi.

Dimapur Airport nung tarur ajak dang Covid 19 tendangtsü anungji senzusenbongertemi negative Covid-19 test report bener arutsüla, ta Rajesh Soundararajan-i saka metetdaksüogo.

Sorkari tuyuba ama tesem mashi nung COVID 19

tendangtsü, ta paisa shisem.

Senden nung Dimapur CMO, Dr. Mereninla-i o jembidang "public-i Covid-19 atema kanga zübazülema bilemer anungji züngsemtemi Medical department den yaritepa ba osang prokshiba nung yariteptsü mepishir" ta ashi.

Külem, District Immunization officer, Dr. Rebecca-ia Dimapur nung Covid 19 vaccine agütsüba osang metetdaksü.

Dimapur nung arishi küm 45 ser temapur nisung 50 aser timba aliba office tem nung vaccine session centers lapoktsü indang jembidang Dimapur DC-i office aika nung nisung 50 tema malitsü akok anungji office tem lokteptsü atema mepishia metetdaksü.

Dimapur nung Chairman & GB unions lennirtemia DTF dang ward wise vaccination drive agitsü mepishi aser ibaji medical department-i agizük.

## COVID-19 Nagaland: Nisung 7 dak putet

**Kohima, April 9 (TYO):** Hokolbarnü Nagaland nung nisung 7 dak COVID-19 putet aser parnok züngsema nisung ajak agi 12,388 kümogo.

"Tanü nisung 7 dak COVID-19 putetogo. Parnokji Dimapur nung nisung 6 aser Kohima nung 1 lir. Külen, Dimapur aser Tuensang nung nisung anana taneptsü nguogo" ta Health & Family Welfare Minister, S Pangnyu Phom-i metetdaksü.

Nisung 12,388 rongnung 11,988 taneptsü nguogo aser tang parnok 146 anepaludar, ta paisa ashi.

Nagaland nung COVID-19 nungi taneptsü angurji 96.77% lir, ta Health & Family Welfare Department Director, Dr Denis Hangsing-ia metetdaksü.

"Tang tashi nung COVID-19 puteter nisung 91 süogo saka parnok 10 bo tanga timtem ajanga asü. Külen, nisung 162 tashi tanga state temi ogo" ta paisa ashi.

Hokolbar tashi nung Nagaland nung nisung 80,278 nem covishield indang dose 1,08,565 agütsüogo.

Nagaland nung COVID-19 indang vaccine agirtemji

frontline workers 38,903, healthcare workers 12,520, teintet rogo 17,151 aser arishi küm 45 ser temapur 11,704 lir, ta Dr State Immunization Officer Dr Ritu Thurr-i metetdaksü.

Vaccine agirtem rongnung frontline workers 18,426, healthcare workers 8,723, teintet rogo 736 aser arishi küm 45 ser temapur 402 tashi dose anaprong agiogo, ta paisa ashi.

Tanü tashi nung COVID-19 vaccine agir shinga dak-a temang nung timtem adokba osang mali, ta Dr Thurr-isa ashi.

## Assam 2021: Congress-i anir telok balalai candidate tem anier

**Guwahati, April 9 (Agencies):** Assam assembly election nung vote enoktsüba tembangogo saka political party tem tsingda sen yong candidate alizüktepa tsübuteper.

Assam nung Congress-i aniba Grand Alliance-i taruba sorkar akümsü temolung alemer saka parnok lennirtemi pei pei candidate dak temolung melemteter.

BJP aser parnok den yaritepa teloktemi tanga party tem nungi candidate tem mesüzüka alizükba tsübuba agi Grand Alliance nung adenertem- Congress, AIUDF aser BPF teloktemi parnok candidate tem Assam adena anir aotsü sentong lir.

Hokolbarnü Congress-i candidate 20 tashi Rajasthan-i anir ogo aser AIUDF candidate 22 tashi Assam toksür ogo ta osang angazüker.

Congress aser AIUDF-i parnok indang candidate tem Jaipur nung aliba Hotel Fairmont nung mongdaksütsü. Assam nung election result madok tashi parnok state nungi pilar ayutsü ta osang ajanga ashi.

Iba mapang candidate shia nem mobile phone balaka agütsütsü.

Hagrama Mahilary-i aniba BPF candidate ka danga state adena anir mao lir saka parnok ajak tanü nikongdang Kokrajhar nung adenshitsu jatepogo.

May 2, 2021 nü Assembly election indang votes azüngtsü saka Assam nung opposition teloktemi parnok candidate tem BJP-i mesüzüka anir aotsü tsübur.

"BJP-i election nung tamakok anguba sülen Congress candidate tem mesüzüka anir aobaji yimya ka ama kümogo. Anungji parnoki (teyariteper teloktem) kümdanga linür" ta Congress lennir Randeep Singh Surjewala-i ashi.

"Yangi arurtem ajak onoki anepalutsü. Onoki parnok koba party nungi aru aser kechi atema aru'ar memetet. Nisung 20 shi ka arua lir.

(Maneni tapak 8 nung...)

## Queen Elizabeth II kinungbo Prince Phillip süogo



Prince Phillip dang Duke of Edinburgh ta ajar aser pa arishi küm 99 liasü.

"Her Majesty The Queen-i kanga dang temolung raksaa la kinungbo His Royal Highness The Prince Philip, Duke of Edinburgh asüba osang metetdaksü. His Royal Highness tanep Windsor Castle nung tiptema dang amozüka ogo" ta British Royal Family-i sangdong ka nung metetdaksü.

"Royal Family-i alima nung nübortem den külempi pa asüba mangyimer" ta parnokisa ashi.

Prince Philip ya tawa tu London nung aliba King Edward VII's Hospital nungi anizüka liasü.

Prince Phillip ya June 10, 1921 nü Greece nung aso. Pa ya Greek nunger chuba jabaso liasü aser 1947 küm pai Elizabeth den kibong aküm. British putiotsü nung Chubatsür kinungbo arishi talangtiba aliba pa asütsü.

Pa dang Duke of Edinburgh ta aja aser Queen Elizabeth-i küm 69 tashi yimsüsü arudang pai pa kinungtsü nungita aruogo.

(Maneni tapak 8 nung...)

OFFICE OF THE HEAD MISTRESS

GOVT.HIGH SCHOOL MANGMETONG

No. GHS/MTG/DEV-1/2021-22/15/ Date : Mtg. 09 th April 2021

--- PELABA LEMSATEPER ---

Ozü Kaket Riju nung nüngdak ta ajiteta yaritepa asoshi item lokti ana dang Govt. High School Mangmetong staff aser kaketshirtemi kangasa pelaba iba osang kaket ajanga lemsateper.

- i) Mangmetong Village Council-i sen Rs. 2,00000 /- ( Rupees Two lakh) staff room extension nung amshitsu agütsü.
- ii) Mangmetong Baptist Arogo-i tanurtem tanü tensa den apet kaketshisatsü angazükba nung tali renlokdaksütsü asoshi LCD Projector ka Rs. 50,000 /- (Fifty Thousand ) shi alang school nem agütsü.

Nenok tenla/ mapa tajung asoshi Tsüngremi maneni moajangma.

Sd/-  
(OPANGKOKLAAIER)  
Headmistress,  
Govt. High School Mangmetong

**London, April 9 (Agencies):** süogo, ta Hokolbarnü England Chubatsür, Queen Buckingham Palace-i Elizabeth kinungbo Prince Phillip metetdaksüogo.

## WSYF-i taoba mapang tatalokbatem asadangshitsü akhang

**Dimapur, Rongchii/April 9 (TYO):** Media osang balala nung Lamhainamdi yimtsüing ya Peren district nung lir ta sangdongba osang angazüka Western Sumi Youth Front bangkar. Iba tesem ya mangatetep adoker aliba tesem ka, aser Peren mesera Dimapur district nung züngoksema mali. Kasa mapang nung Opposition, lenir T.R. Zeliang-i April 5 nü iba tesem semdangba mapang state sorkar kübok Department Information & Public Relations-i 'Lamhainamdi' tesem ya Peren district kübok ali ama osang sangdongba ngua kanga bangkar, ta WSYF-i ashi.

Kiyevi yimtsüing ya Nagaland state meküm tet tsüingda 1939 küm amenok aser kuli kaketem balala ajanga mangatetep adoker aliba tesem ya Dimapur district, Dhansiripar sub division kübok Kiyevi yimtsü litsü nung aliba jangja jangja sayua lir.

Ajisüaka district ana tsüingda arrtsü ano mebentet ta angatetba den state sorkari kuli tejangja aliba dak ajemdaker ochi obendang agütsütsü ta amanga WSYF-i, mangatetep adoker aliba tesem ya Dimapur district kübok lir ta sashi sashia mejembir, saka ken o jangjatsütsü atema mapangshia

ola adoka arudar. Onok ola madokba ajanga mangatetep adoker aliba tesem ya Kiyevi yimtsüing litsü nung mali ta bendanga agütsüba ama mangatetpsüla. WSYF-i, taoba mapang koma liasü yamaji iba tesem ya Dimapur district küboki aita daksütsü atema tatem tashi nokdangtsü, ta ashi.

Lamhainamdi yimtsü ya mali aser Manipur nungi ali atsüingertemi Kiyevi yimtsüing litsü nung ozüing alema iba yimtsüing amenoktsü meranger. Anungji "Lamhainamdi" ya yimdangjem ka dang aser tang jembishinüba ken o nung shisemtsü malang.

Sorkari iba arrtsü ken o bentettsü süoki ia agir asünungbo, March 22 nü tatalokba dak dang merangloki taoba mapang tatalokbatema temulung agüja asadangtsüla.

State sorkari 2021 küm February ita Khehoi yimtsüing nung süngtonglitong raksatsüba aser ki rongtsüba asadangtsü atema tangsa tang asadangtsüla. 2011 küm Inavi yimtsüing village headman aser chairman tepsetba dena March 22 nü tatalokba temulung agüja bushitsüingdangba ama tanaben asadangshitsüla, ajita asünung dang telok anaprongla nem ochi obendang agütsütettsü. 2011

küm tatalokba ya tang CM-i Chief Minister mapa bener aliba mapang atalok aser tang tashi obendang magütsüi lir. CM atema taoba mapang tatalokbatem nung aibelenalirtem aputsü atema maongka tajung lir, koba ajanga tia maka March 22 nü lendong atalokogo. Iba ajanga telok anaprongla nem ochi obendang agütsütsü. Ken o ajunga bentettsü atema tatalokba ka dang shimba ajanga telok ka pusemba sayur aser taoba mapang takoksa ajururtem nem ochi obendang magütsür, ta kasa sangdong ajanga ashi.

April 8 nü Deputy Chief Minister-i, mangatetep adoker aliba tesem semdangba mapang sorkari iba ken o süoki ia agiba metetdaksüogogo aser SIT tentettsü indang jembio. Sorkari kasaji taoba mapang tatalokbatema süoki ia agütsüla aser SIT atsülangshia tatalokbatem ajak bushitsüingdangtsüla.

WSYF-i onok meyong litsü kümzüka ayutsü bendanga agütsür lir aser kasa mapang nung tebandang makai ochi obendang agütsüti süra takok tashi teka amteper inyaktüsü mulunga lir, ta Western Sumi Youth Front Media Cell sangdong ka ajanga metetdaksü.

## Chakhroma Youth organization-i ken o jangjashitsü

**Dimapur, Rongchii/April 9 (TYO):** Dimapur District, DC office Chiimoukedima-i belener aotsüba ken o dak sendakba nung titsüba aika ajangshiba sülen Chakhroma Youth organization-i ken o jangja shitsüogogo. Iba dak sendakba nung Dimapur indang district headquarter ya Chiimoukedima ta tejangja aser shingai ashishitsü makok, ta parnokki ashi.

District ya Dimapur jila telongtet tila ka ya dang masü saka anüolen tip nung Tsiepama, Piphema, Zhuikhu, Hekishe, Tsii-iima, Medzlpheema tesem, anüolen Riizaphema, Zutovi, Shokhuvi, Bade, anüodoklen Nihokhu tesem aser lenden nung Niuland tesem ajak ya Dimapur

district küboki aiter.

Dimapur district yagi alinük tulu ka ayimjemmer aser nürburtem district kübok tesem balala nung prokshia lidar sünnung kechiba Dimapur nung amedaker aliba Unions mesera lokti tentet ishikati parnok anisüingzüka aliba metoktsüteti mesera Dimapur district ajunga nung aliba nürburtem atema telemtetba agütsüla. Anungji administrative office ya Chiimoukedima-i tangsa tang beneler aotsü nüngdaka lir, ta kasa sangdong ajanga metetdaksü.

Iba ken o ya kin dak ajemdaker lokti tentet kari nürburtem mangmangdaksütsü atema osang tai prokshidar, anungji DC Complex tasenba ya Chiimoukedima urban

administered municipality küboki aiter ta jangjashitsür. Item loktitentet inyaksangshi ya loktilibaren asoshi lendong lir aser repringshim mesüi toktsüra meyanglushitetsüsa teraksa adoktsü, ta parnokkisa ashi.

CYO-isa, Dimapur deputy commissioner dang district nung mejangjaba lokti tentetem nokdangtsü aser asadanga alitsü mepeshia metetdaksüogogo. Maneni nürburtem dang tangatetba akatsü aser sorkari Dimapur DC office Hq. Chiimoukedima nung amenoktsü atema jenjang tapet agütsü asoshi tamang akatsü atema tir Seyieneilhou aser general Secretary Noseho Peter nati külem sangdong ka ajanga metetdaksü.



HQ IGAR (N) tawabangba kübok Assam Rifles Jalukie Battalion-i, "World Health Day" nü Govt Middle School (GMS), Peren, nung kaketshirtem atema awareness campaign ka ayongzüka katsüba den otsünü tetoktepba ka katsüogogo. Anema alitsü atema yimya tajungtem indang Assam Rifles Medical Officer-i tangazükba agütsü aser iba sülen kaketshirtem temang tendangja liasü. Class 6, 7 aser 8 nungi kaketshir 96 temang tendangtsüogogo.

## District ajak nung National Lok Adalat agütsü

**Dimapur, Rongchii/April 9 (TYO):** Nagaland State Legal Services Authority (NSLSA) tawabangba kübok National Lok Adalat (People's Courts) district headquarters ajak nung April 10 nü agütsü. Iba ya 2020-2021 atema Ibuba Quarterly Lok Adalat asütsü.

District court telung nung Lok Adalat Benches 11, District Legal Services Authority (DLSAs)-i amenoktsü.

Lok Adalat ya ken o bentettsü atema lenmang tanga ka lir, kong okadak ken o bangadak alibatem aser pre-litigation stage nung aliba ken o tem bentettsür. Lok Adalats nem Legal Services Authorities

Act, 1987 kübok statutory status agütsüogogo.

Iba Act kübok Lok Adalat temi telemtetba agiba ya civil court ka indang obendang ama agütsü, koba ken o nung sendaka aliba teloktem ajaki anidaksüla aser telemtetbatem ya okdak mebenokshitettsü, ta shia lir.

Lok Adalat nung ken o benokba atema taa kecha magir. Okadak bangdaka aliba ken o ka Lok Adalat nung bentettsü atema tuyua ken o bentetra okadak taa agütsür aliba dena meyipa agütsütsü. DLSA nung bentetba ken o tem ajak State Authority indang web portal nsls.nagalandgov.in nung upload asütsü.

## Peren DC-i tetuyuba agütsü

**Dimapur, Rongchii/April 9 (TYO):** Disaster Management

Act, 2005 kübok COVID-19 wara poktetba ya health emergency ka ta angateta lendong tulu ta sangdongogo. Nagaland Disaster Management Authority, Government of Nagaland-i tetuyuba aser SOP tem mapangshia agütsür, koba COVID-19 tashidak prokshia aoba nokdangtsü atema lir.

Ajisüaka lokti nung mask asema, establishments balala nung teka metsüktsü atema metoktsüba aser tetsüingda inyaksangshi masüba repringtetogo aser iba ajanga aibelenertem tashidak menatsü lendongbang nung toktsüba dang masü parnok meket alirtema lendongi idaksür.

Anungji Home Department, General Administrative Branch, GoN tetuyuba aser Section-51 of the Disaster Management Act, 2005, Epidemic Diseases Act, 1987 aser Indian Penal Code, 1860, Section-188 dak ajemdaker Deputy Commissioner Peren, Sentiwapang Aier-i April 7 nü tetuyuba kar agütsüogogo. Tetuyuba kübok SDTF aser ken o dak sendaka aliba lokti tentetemi SOP aser tetuyuba sülen manidaker nem temerenshi agütsütsü.

Office, bank, shishilembadak aser business establishments, restaurant, hotel, public transport, social aser tamangba yimsü dak sendakba nung senden, educational institutions amala lokti adenshiba tesem nung mask masemertem dang aibelenba shia senchi sen 100 achitsü. Iba tetuyuba ya ASI aser temaba jenjang nung aliba police ketdangsertem aser Transport-Assistant Road Safety aser Enforcement Inspector aser temaba jenjang nung aliba ketdangsertemi

benoka inyaktüsü.

Dokan aser business establishments, restaurant aser hotel tem nung hand washing facility/hand sanitizer magütsürtem dang mezüing aibelenba mapang senchi sen 100 achiba den tekümdaksü metetdaksütsü. Mezüing aibelenba sülen hopta ka lir ano maneni tetuyuba sülen manidakra facility tem magütsü tashi establishment tem shibangtsütsü (registration /license suspend sütsü akok). Iba tetuyuba ya Urban Local Body-i achaayangtsü.

Bus, taxi, auto-rickshaw nung tetuyuba ama passengers manishira National Disaster Management Act, 2005 aser Nagaland Epidemic Diseases (COVID-19) Regulations, 2020 kübok ken o benoktsü, koba ASI aser temaba jenjang nung aliba police ketdangsertem aser Enforcement Inspector aser temaba jenjang nung aliba ketdangsertemi benoka inyaktüsü.

Quarantine, isolation, contact tracing, testing (e.g., contact indang osang magütsüba, test asütsü memulungba, quarantine mesera isolation inyakyim sülen manidakra, COVID-19 tashidak agi tonger alirtem mezüingmeshiba amala) dak sendakba nung tang benoka aliba SOPs/advisories tem indang clauses/provision tem sülen manidakra National Disaster Management Act, 2005 aser Nagaland Epidemic Diseases (COVID-19) Regulations, 2020 dak ajemdaker ken o benoktsü. Iba maparen ya District Task Force-i achaayangtsü.

Maneni DC-i, iba tetuyuba ya osang agütsüba anogo nungi osang tejangja ka magütsü tashi benoka atatsü ta metetdaksü.



Assam Chief Minister Sarbananda Sonowal-i Hokolbarnü Congress lennir aser taoba chief minister Bhumidhar Barman semdangdang agiba noksa angur. Barman ya Bodbar nungi Dispur hospital indang ICU nung anioka anepaludar. (Guwahati, April 9)

### TIPRA-i polling booth 70 nung re-poll asütsü akhanger

**Agartala, April 9 (Agencies):** Tripura nung TIPRA Motha-i High Court nung polling booth 70 nung re-poll asütsü atema takhangba agütsüogo.

Tripura Tribal Areas Autonomous District Council (TTAADC) nung election mapang polling booth aika nung tim masüba mapa inyakogo ta TIPRA Motha-i ashir.

April 6 nü polling asüdang tim masüba mapa aika inyakogo anungji Election Commission-i item polling station nung re-poll asütsü atema mapa inyaksü atema takhangba agütsü, ta TIPRA

Motha general secretary Animesh Debbrama-i Agartala nung osangbener dang ashir.

"Ajisüaka, Election Commission-i mapa kecha meinyak. Anungji onoki High Court dangi iba ken o benogo aser Tripura Tribal Areas Autonomous District Council (TTAADC) kübok constituency balala nung polling booth 70 jungnüa nung re-poll asütsü akhanger" ta paisa ashir.

TIPRA Motha dak alia CPI(M) aser Congress teloktemia polling booth aika nung tim masüba mapa inyakogo ta tai tongloksür.

April 10 nü counting halls

nung votes azüngtsü tensa majungtsü akok ta TIPRA Motha general secretary Debbrama-isa tsübua bilemba olen ka ashir.

"April 10 nü BJP aser IPFT züngsemtemi tesem balala nung ozüngi memelaba mapa inyaksü ta olulutem angashir. Parnoki counting center atsüngdoktsü aser votes azüngba maparen nung teka aitsü akok" ta paisa shisem.

CPI (M) state secretary Gautam Das-ia BJP züngsemtemi counting centers nung tim masüba inyaksü tsübua bilemba olen ka metetdaksüogo.

### Meghalaya nung ILP takhangba agütsüshir

**Shillong, April 9 (Agencies):** Meghalaya nung telok balalai state nung Inner Line Permit (ILP) system tenzüksü atema takhangba agütsüshir.

Khasi Students' Union (KSU), Ri-Bhoi Youth Front (RBYF), Federation of Khasi-Jaintia & Garo People (FKJGP) aser Hynniewtrep National Youth Front (HNYF) teloktemi ILP tenzüksü akhanger.

Meghalaya kübok Byrnihat nung parnok senden ka amenba sülen ILP tenzüksü takhangba

agütsütsü tenzüko. Teloktemi Assam-Meghalaya arrtsü anasa aliba yimtsüng lennirtem den külemi sendenji amen.

Parnokisa Meghalaya sorkar dang Meghalaya Residents' Safety & Security Act (MRSSA) mapa küma inyaksü takhangba agütsüogo.

"Meghalaya sorkari state nung alirtem ashioktsür. Centre sorkar-i state sorkar den külemi Meghalaya nung mapang shia ashiokja arur.

Parnoki tiyazü tenanzükbatem agir aser sorkar atema tongtipangtiba teinyaksüji Inner Line Permit (ILP) mapa tenzüksüba lir ta nangzüker" ta telok pezüi metetdaksüogo.

"Onoki Meghalaya nung ILP tenzüksü takhangba agütsütsü atema bangzüntepogo aser sorkari haihaura maka tashi maneni lungkak aittsü" ta Raid Marwet nung tanishir Ken Syiem-i ashir.



Guwahati nung aliba Gauhati Railway Station nung health worker kati mozü agi COVID-19 testing centre merüktetba angur. (Guwahati, April 9)



**बैंक ऑफ बड़ोदा**  
**Bank of Baroda**

India's International Bank  
Regional Office, Jorhat,  
Crystal Enclave, Seuni Ali, Borpool, A T Road, Jorhat-785001, (Assam)

**KIOJEN NÜNGDAKER**

Bank of Baroda-i Dimapur nung Circular Road branch belentsü atema tawa 1600 (+-25%) sq ft. den ATM atema tawa den power peria aliba kiojen indang owners/ Power of Attorney Holders dang metetdaksür. 02.05.2021 tashi nung The Assistant General Manager, Bank of Baroda, Jorhat Region, Crystal Enclave Seuni Ali Borpool Jorhat-785001 dangi Technical bid aser Price bid ta zülur sealed cover nung shidi balala ana yoktsüla. Public Sector Units/Govt. Department indang kiojen nem mezüng maongka agütsütsü. Osang tejangja metetnürtemi onok indang website [www.bankofbaroda.com](http://www.bankofbaroda.com) nung reprangtsü akok.

Bank-i kuli kecha magütsüi shidi agizüksü mesüra magizüksü temeten agir.

Place : Jorhat  
Date : 10.04.2021

Sd/- Assistant General Manager  
Jorhat Region

### Mizoram nung ak 276 süogo

**Aizawl, April 9 (Agencies):** Mizoram kübok Lunglei district nung ak 276 süogo, ta ketdangsür kati ashir.

Brihostibarnü Mizoram animal husbandry & veterinary minister Dr. K. Beichhua-i iba tesem semdangogo.

Lungsen yimtak ak asüba kuli tejangja mengutet lir saka mezüng bushisügang asüdang African Swine Fever (ASF) ajanga asü asütsü akok ta bushitetogo.

Lungsen ya Indo-Bangla arrtsü anasa lir aser Lunglei jila nungi kilometer 57 shi pilar lir.

March 21, 2021 nü iba yimtak mezüngbuba ak asü.

"Brihostibar nikongdang 2:00 ako tashi nung ak 276 asüba osang angazükogo," ta State animal husbandry & veterinary department joint director (Livestock Health) Dr. Lalhmingthanga-i ashir.

Brihostibarnü ak sample tem Bhopal tongogo aser kobi melii osang angashitsü imlar, ta paisa ashir.

National Institute of High Security Animal Diseases

(NIHSAD)-i bushisügangba sülen osang tejangja metetdaksütsü, ta Dr. Lalhmingthanga-i sa metetdaksü.

Mamit district kübok yimtsüng asem nung ak asüba osangtem lir. Yimtsüng asemprong ya Bangladesh aser Tripura den arrtsütepa lir.

Mamit district kübok yimtsüng asem nungi laboratory test atema ak sample bendenogo, ta paisa ashir.

Mongulbarnü sorkari Lunglei district ajunga 'surveillance zone' ta sangoktsüogo.

Ak wara azüoktsü atema sorkari iba tetuyuba agütsü.

Mizoram-i Assam, Manipur aser Tripura den inter-state border aser Myanmar o Bangladesh den international boundary lir.

2020 nung Assam, Arunachal Pradesh, Meghalaya aser Manipur nung African Swine Fever (ASF) ajanga ak meyrjang aika süogo.

Testüiba mapang Myanmar nunga AFS ajanga ak aika asüba tensa ajuruogo.

### Tripura Deputy CM Varma dak COVID-19 putet

**Agartala, April 9 (Agencies):** Tripura chief minister Biplab Kumar Deb dak Covid19 putetba sülen deputy chief minister Jishnu Dev Varma dak-a putetogo.

Brihostibar anügang Tripura deputy chief minister Jishnu Debbarma dak Covid19 aliba putet aser pa tang kidang balaka lir.

"Tanü kü dak Covid19 aliba putetogo aser home quarantine nung lir. Asenok ajak lendong nungi jenbua lidi" ta deputy chief minister Bishnu Dev Varma-i metetdaksü.



Taoba Mongulbarnü Tripura chief minister aser deputy chief minister naprong sentong ka nung külemi aden.

### Manas National Park nung güntoki nisung ka tepset

**Guwahati, April 9 (Agencies):** Manas National Park & Tiger Reserve (KNPTR) nung Hokolbarnep güntok kati

forest department ketdangsür ka tepset.

Güntok jagi Bhuyapara Range nung forest guard Animesh Deka amak.

"Idangjisa Deka asü" ta Manas National Park nung ketdangsür kati ashir.

Arishi küm 34 tain Deka

ya Baksa district kübok Bhabanipur nungi liasü aser ita asem tejangdang kibong aküm.

Yaküm Covid-19 wara ajanga shibanga ayuba sülen October ita nungi ang Manas National Park (MNP) lapoka liasü.

1989 küm UNESCO-i MNP ya 'biosphere reserve' jenjang nung ajungket aser 1995 küm World Heritage Site ka ta agizükogo.



## TIR YIMYIM YIMOBILEM (EDITORIAL)

DIMAPUR KÜPTOKNÜ, RONGCHII (APRIL) 10, 2021

### Mapa inyakdak alitsüla

**G**overnment mapa nung alirtem pei mapa inyaksü lemzüksüba tesem nung lia mapa inyakba ama, asenok aluyimertema akhi putu mapang ama yimtak dang ki o ki na tsüngda jara dang ittepba metsütepa melii, putu tasenba nung yabo asenoka pei ali kimong tasen bushia pei mapa inyakdak alitsüsa senshitsu. Tang tashi asenok aika akhidang asen tsürabur yimkümertemi mesemtetba kimong nung dang lia asen akhi alu tasener. Ajia junger saka kodang asenoki jungjunga bilemdangdir, asenok tsürabur yimkümertemi mesemtetba kimong nung dang lia alu tasenba tetezüji, ano asenok tsüraburtem libaliro nungi tatsükata tejakleni renloka maoa ta angatetsü. Tetezüji, tsüraburi yatetba kimongji menendokang ta ashirba masü saka tsüraburtem mapang libaliro aser inyaksangshi nungi asenoka terabo temetetba küma terenlok sayutsüla ta angatetdaksüner. Ashiko, asen tsürabur mapang lepteptsüngtep mali asübo, kecha tarendak aser tetsübu melii tsümar yimküamato, pei pei lu ayimdak jokshia jokshia alu aser kimong mesemtetba lila ta bilemer. Ajisüaka, par mapang tensa kenyongi balaka, külemi yim ka kümtetter liaka, iba jagia temulung anisüngzüka tesünep nung alitsü makokba lepteptsüngtep putu asünungji, yim süngküm agi mitsa kümer külemi alitsübaji nüngdaka liasü. Iba amaji tenem tekong bushia dang asen tsüraburtemi yim aküm aser yangji lia ongpang lu aser azüng lu yima ali aser ibaji asen sobaliba aküm. Iba sobaliba nung jagi asenok ano tajung küma tejakleni renloka mouteti timatemer. Iba jagi asenoki tangar tejakleni aoba mangur aser peii inyakba agi pei boka mesüngtet pei temeten dena ayoktsüsa alir. Iba tiagi kodang bilemdangdir, asenok alidak aser asen akhi sobaliba nungi mepilatetba ajanga asensasa asen yimtet moutet timatemer ta angatetsü. Tanü putu nung shibaibo anogo shia yimtak nungi azünglui tasentsü ? Shibaibo yimtak nisung den külemi shiruru metsüa alitsü ? Itemji kodang bilemdangdir, town nung government mapa inyaker aser business tapu balala inyaka alirtem dak alaka, asenok yimtak alir aser town nung alir asüyonga kecha meinyaki alirtembo asen alu ayimdak mesüra mapa inyakdak kimong tajung mesemtetba talitsü ki yanglur , yangji lia mapa inyaksüla. Tanü putu nung aluyimba tsütsü asenok asoshi temelenshi ka nüngdabaji aji asütsü. Iba temelenshiba yimya nung asenoki alu yima mali tashi, asenok inyakba agi asenok tebok masüngtsü. Asenoki nashi, nabong, ak aser an metsüa linür, saka kodaser tangar den külemi kishi nentepa yur asen ki anasa shiruru metsütsü ? Ibaji kodang shisadangdir, asen kija oagi alumang tuluka mesemtetba yangji ki sür, kiset shirurutemji farm küma metsüa alitsübajiang jangratemtsüka asütsü ta asenoki angatetsü. Aji oda kodang, asenok alu nung lia alu yimdir, anüngdang anü tatsük nung meinyakyonga, anepdang aser nikongdang anü tanük mapang inyakba agi alu tulu yimtetba takar küma alitsü. Atangji, tanü asüng nisung karbo yimtak nungi pilar süngjanglu yima yangji aliba angur aser ano karbo yimtak nungi pilar tesem tajung tesadem atsübang yur ak aser an metsüba angur. Iba amaji kodang asenoki yim among adena oagi alu nung lia alu tapu balala inyaksü tenzükdir, aji asenoka tsürabur putu nungi tanü putui ayaok tenzüker asütsü. Joko, tanü asüng yim tasen akümba yabo akhi tsürabur yimkümyimya nung masü saka alu inyaka alitsü nükjidong nung, jokshia jokshia asüyonga, pei lu nung pei ki süa alitsü tenzüksüla. Atangji, asenok lipok aser ayak mesamatsü asoshi asenoki asen tetsü oshi mesendoki sapua jembitsü, asen otsü aser asen ken aser yartsüngsang mamadoktsü. Tanu putu dak apet sentong yanglua tsürabur mapang nungi monga aruba benjongbentsü amongtsü. Itemji asen senmang akümtsü. Item dakji alaka, asenok yimtak kishinentepa aliba sobaliba aser yimtak lia dang ongpang lu aser azüng lu ayimba sobalibatem endoker, tangatetba aser nükjidong tuluba nung , joko tangbo, alu nung lia alu ayimtsü aser mapa inyakdak lia mapa inyaksü sobaliba tasen ka tenzüka, asenoka tejakleni ao tenzüksüsa ajungshiteptsüla aser tajungshirtemi anir tanü putu aluyimba maparentemji memenui tenzüksü junger. Iba jagi dang asenoki asen lima nung aliba temoatsütem agitettsü aser asen lima nung asen temeten shinga danga meyoki asen mapa, asen taküm aser lima agi asensasa asen nümadangteta alitsü.

## OLEMSABANG

### Kaket züluba nükjidong aser Arogo kimung

~ Wati Longchar (Serampore)

Kaket züluri nükjidong balala yur zülur. Laishiba ya Yihuda nunger rongnung koda Tsüngrem jungkai adok ibaji sayutsü nükjidong nung zülü. Yongji "Naga" ta ken danga zülua mangutsü. Kin karbo mojing amai kümdakja züluba angutsü. Tasen Lai züluria Yisu indang tangatetba balala aser nükjidong balala nung züluba angutsü. Kari bendanger Yisu indang angatetdaksütsü, kari Yihuda nunger tezülur aser yimsüsür pur nem angatetdaksütsü, kari tekübokba nung alir tekümtet asoshi Yisu aru ta angatetdaksütsü, kari Yisuji atangji Tsüngrem ta sayutsü, a.a. tangatetba balala nükjidong nung zülü. Yongji Khristabo ka dang, saka Yisu indang ratetsü nükjidong balala yur tezülur shiai pei tangatetba nung zülur. Kati zülubaji tai, mesüra kati zülubajiang shitak yangji mali. Nükjidong balala nung zülü, nai/lai zülubaji dang shitak aser tangari zülubaji tai ta iba nungji madoker.

Missionarytemi zülua yutsüba kaket, dairy/journal par kechi nükjidong nung zülü aji metettsüla. North East India nung missionarytemi zülua yutsüba kaket rongnung Mary Mead-i züluba kaket A Corner in India ya tejentiba kaket rongnung ka lir. Tanü otsü züluri lai iba kaket züluba nükjidong tulutibaji, America nunger shirnoki asen lima kodanga mangudang, parnok mulung ajongmesotsü aser Naga mission asoshi rongsen mulungosa tenladaktsütsü tayongzüka kaket ka ta shiteter. Kasaji F.S. Downs-i züluba kaket, The Mighty Works of God ya America mission koda takok ngua züina ao ibaji sayutsü nükjidong nung zülü. Anungji tezüluri shinüba kaket mulungji kechi aji angatetsü nungdak. Kaket anaprongla nungji lisopuri arogo yangerba nung koda shilem agi iba indang tejangja shia mangutsü.

Meimchiri züluba kaket ka asü nung kodanga tabensa malir. Aibelena zülusemer. Khen khenbo metetsümonga aibelena zülua ayur. Ano research junga agir kaket züluba ajanga ochi o, miima akaba, memeteti aliba shisatsü tasen nguteter. Kaket ka kodang züludir, kaketji kibur mesüra tadoktsü meyong, saka kechi zülua yutsüogo ajibo nüburttem meyong (public property) senti senmang ka akümer; iba shisatsüji lokti aser tarutsü lanur asoshi shisatsü tasen bushiloka aotsü kimung ta angatetsüla. Shisatsü tasenji lokti meyong asü nung research agirtemi kaketji tai, shitak, iba nung ya hau asür, yabo shitak masüa ta zülutsübaji tongtibang aser yamaji inyakba ajanga lokti kaji aener aser tangatetba tasen agütsür. Tezüluria aser tazüngeria pai/lai zülubaji dang shitak ta mangatetsüla. Lokti tentet balalai talisa Roman Catholic aser Muslim fundamentalist teloki parnok tamang aser tangatetba anema ta sür kaket ban sütsüba, senchi achiba, linük nungi aridokba, telok nungi jendokba, jail nung poka ayuba, aser ano karbo tepseta indokba, mesüra tepsettsü merangba otsü aika lir. Iba amaji inyakba ajanga lokti mainer aser democratic lima nung yamaji inyakbaji tim masü ta angateta arudagi.

Putu aika dang kin ka otsü züluba aser azüngba ta kodang südir ya temalen/azüklen alir - takar aser yimsüsür - indang ta bilem, aser parnok otsütemji azüng aser mokosto südaktsü. Yamaji kaket züluria chuba, takar aser tulur otsü dang züluba angutsü. Nübur maten koda temalen/azüklen alir indang dang zülutsü? Ibajibo otsü shitakba masü ta tanü otsü zülur aikati ashir. Anungji tanü otsü züluri jendoka alir, aser otsü nung mezüngokba, meshisemba aser jendoka alirtem (subaltern or margin's perspective) nungi zülushitsüla nungdak ta ashir aser yamaji zülushir. Tat. agi., Taj Mahal Shah Jahan chubai yanglu ta otsü azünger, saka nüburttem shirnoki amang-sangwa, anü pua, tzünglui aja meranga inyak parnok tenünga mezüngshir, anungji otsü nung zülua malia nübur tsütsü nungi otsü zülushiba ajanga shitakba ochi otsüji adoker. Ano tezülur kari, mesüra kar yimsüsüba mapang nung otsüji asaa tiyazü zülua yutsür. Tat. agi, tanü India nung BJP leniri India nunger otsü tashiyim agi meyipsatsütsü merangba ama taoba putu yimsüsür balalaia inyaka yutsüba angutsü. Ano telok karibo takok otsü dangashi, tamakok otsübo mejembir aser miimbanga ayur, khen khenbo tiyazü shia yutsür, mesüra zülua yutsür. Asen tetsü-tebou mapanga tamakok otsübo aiben mejembi aser miimbanga yutsü. Takok dangashi, tamakok otsü mali. Anungji otsü ka jembia aruba aser zülua yutsübaji shitak asür masü ibaji metettsü otsü züluri nübur shirnok otsü nung metetshir, zülua mapai parnok tsütsü nungi otsü angatetsü aser bushitsü meranger.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# India nung minorities atema tebilemetsü akar: Raja Khrisnamoorthi

**April 09, 2021:** US nung Illinois nungi Congress representative, Raja Khrisnamoorthi-i India linük nung minorities anema inyakba atema ola adokogo.

Tawa America nung rara tatalokbatem dak sendakba nung pai, "Alima nung democracy linüktem nung kasa tayongzüikba ya ajurudar, aser item linük rongnung alima nung secular democracy tulutiba- kü tasoli India densema lir. US nung ama India nunga tamangba yimsü aser sobaliba balala nungi nisungtem- Hindu nunger, Muslim, Khristantem, Sikhs aser tanga yimsü amangertem jenti lir aser kin balala nungi nisungtem lir. Item nübur ajakji sadoksadoka azükarua litettsüla," ta ashi.

Tang India linük nung nütsüng kanga ajema aliba tamangba yimsü balalai reshikangshi kanga ajangshiba mapang ka nung Raja-i India atema tebilemetsü akaba o jembir.

2014 küm Ato Kilonser Narendra Modi leniba nung sorkar akümba sülen nungi linük nung Khristantem anema inyakba tatalokba kanga bulua kümogo.

Hindu yimsü alia amangertem VHP aser RSS züngsemtemi tasü itshir minorities anema inyaker.

2018 küm Chicago nung World Hindu Congress senden nung Khrisnamoorthi-ia jembia liasü.

RSS ya paramilitary telok ka lir aser iba telok nungi züngsemtemi Khristantem, Muslim nunger Sikh aser tanga yimsü amangertem amokmerener aser reshikangshir.

Ato kilonser, Modi-a RSS nung akümüli piyong atema züngsem lir aser pai maneni linük nung Hindutva mapatongtem benoker. Pa yimsüsüba mapang nung state aika nung anti-conversion

ozüngtem agizükogo aser iba ozüng nung ajemdaker linük nung Muslim nunger aser Khristantem anema inyaker.

Ano külen tawa US State Department report ka ajanga India nung meimchir temeden balala anema inyakba metetdaksüba sülen meimchir temeden atema inyaker telok aikati iba report agütsüba atema pelaba lemsatopogo.

Kasa report nungjisa India linük nung tamangba yimsü minority tem anema inyakba indang tejangja shia lir.

Yaküm report nung United States Commission on International Religious Freedom (USCIRF)-i Department of State dang India nung religious freedom anema inyaker, anungji iba linük ya Country of Particular Concern (CPC) nung züngoktsü benoka liasü, ajisüaka Department of State-i magizüki liasü.

USCIRF-i 2021 küm indang report bo ano mesangdong aser CPC recommendations April 21 nü ang sangdongtsüa akok.

India nung watchdog organization balalai taküm-a USCIRF-i Department of State dang India linük ya Country of Particular Concern (CPC) nung züngoktsü atema maneni benoktsü imlar.

USCIRF-i benokba aika magizüktsüa akok, ajisüaka parnoki CPC nung India-a züngoktsü atema maneni benokra ibaji ajanga India sorkar dang tekümdangtsü osang ka sangdonger asütsü.

International Christian Concern (ICC) Director of Advocacy, Matias Perttula-i, "USCIRF-i maneni India linük CPC nung züngoktsü atema benoktsü, ta onoki mlar. India nung minorities atema tensa ano tamajungba kümogo, state aika nung anti-conversion ozüngtem ajanga Hindu yimsü alia amangertem tasü itshidaktsür tanga yimsü amangertem reshikangshir," ta metetdaksü.

Tawa Amnesty International-ia report ka ajanga India nung ketdangsrtemi nüburtem timtemdaksüba, CAA anema longkak aiterem aser aluyimba ozüng anema longkak aiterem dak tashiyim amshiba, Delhi nung rara adokba aser Kashmir nung senso temeden alema inyakba atema aija lir.

Amnesty International indang "The State of the World's Human Rights 2020/2021" report section ka nung nungbo yamai shia lir, "(India nung) Tamangba yimsü minorities amakba aser tepsetba dak sendakba nung mitkartem aser police ketdangsrtemi aibelenertem anema meinyakba tatalokba aika lir."

Coronavirus prokba nokdangtsü atema linük shibangba dak sendakba nung, "March ita nung (yaküm) telatetbatem mebenshiba atema police-i bendanglen aayangertem merenshia ali nung apua jajadaksü. Tenokdangbatem anema inyakba atema apurtem timbaka sensakertem aser meshimejungertem lir," ta report nung shia lir.

# ANO GO ABEN TSÜNGREM DEN

## Saksalemang

*"Anungji tangartem amaji asenoki memejangli saka asenoki saksalema kümdanga lidi."*

*I Tesalonika 5:6*

Yisu Gethsemane atsüki nung sarasademer arudang pai nütsüngtem amua orr angu. Nenoki ghonda ka kü den saaka meliteter no? ya asüngdang, shih nung mejanga aoba indang jembir masü. Saksalema kümdanga alitsüji tensa mapang tia ajak nung tanela tashi itda lira tashi tait ochi, temeim, kuliji shitettsü. Yisu nütsüng mapang kabo kodang tsükchir-i arua Yisu apu iba mapang jenshitsüsa aküm. Ano aji dang masü Yisu sülen anidaker ta-a meshitet, sen-ang tuluba kümdaktsü. Tanü asenok tamanger yamala kar mesükba lir asü?

Yisu sülen anidakerji na aser ni tanü tamangertemji lir. Alima majungba indang jembir, alima teraksa indang jembir. Saka item indangji shirnoki inyaktsü. Saksalema alirtemi inyaktettsü, alima mazüngi liaka sarasademtsü, külemtsüji mezüng südaktsüra, alima raksabaji-a tashi itda, tasü itda inyaktettsü takoktsü lir. Tsüngrem asenok asoshi lira asenok anema shiba lir? Rom 8:31

### Sarasadem

Ni tamanger ka ama mapang ajak nung saksalema alitsü oh Kibuba nai ni yariangma. Amen

# 'My Savior' kensep ajanga Christian Charts temaba jenjang angu



Easter Sunday (April 4, 2021) nü Nashville nung aliba Ryman Auditorium (Mother Church of Country Music) nung Carrie Underwood-i ken atenba mapang tangokba noksa nung angur.

**April 09, 2021:** Country kentener, Carrie Underwood-i la indang Khrista osangtajung kensep 'My Savior' ajanga Billboard's Country aser Christian Charts nung temaba jenjang nguogo; iba kensep ajangasa lai timtemer tanurtem atema US sen 100,000 dak tema aazükogo.

La indang osangtajung kensep sayaba sülen All-genre Billboard 200 list nung jenjang 4buba angu aser Christian aser Country chart nung temaba jenjang angu.

Underwood-i tang agi tekübenbuba Billboard Country charts nung temaba jenjang nguogo.

My Savior kensep nung "Softly and Tenderly" aser "Great Is Thy Faithfulness," densema ken 13 lir. Kasa kensep nungsa "How Great Thou Art," "The Old Rugged

Cross" aser "Amazing Grace" kentem densema lir.

Iba kensep nungjisa ken tenet Country Songs Track chart nung züngsema lir aser item kenji "How Great Thou Art," "Amazing Grace," "Just As I Am," "Because He Lives," "Victory In Jesus," "The Old Rugged Cross" aser "Blessed Assurance" lir.

2020 küm Carrie Underwood-i tesüsabuba sayaba kensepji Christmas kensep 'My Gift' liasü.

Lai charts balala nung takok anguba nüngtem nung lai Easter Sunday (April 4, 2021) nü Nashville nung aliba Ryman Auditorium (Mother Church of Country Music) nungi ken 13 prongla tena live concert yoka liasü.

Iba concert ajanga lai US sen 112,000 aazük aser iba senji

Save the Children US charity telok nem agütsütsü. Iba telok yagi linük 100 dak tema nung tanurtem anema alitsü asoshi inyakba den külemi tanurtem nem shisaliok agütsür.

Universal Music Group Nashville-i ashiba agi, Easter Sunday nü Underwood indang concert ji alima tesem ajaklen nungi nisung million 2.5 dak temai live repranga liasü aser iba sülen-a ghonda 48 tsüngda nisung million aikati reprangogo.

Kasa concert nung Winans-ia Underwood den külemi "Great Is Thy Faithfulness" ken aten aser NEEDTOBREATHE telok nungi tongti kentener, Bear Rinehart-i Underwood den külemi "Nothing But the Blood of Jesus" ken aten.

Underwood indang concert ji Facebook nung reprangtsü akok.



Bendanglen nungi raliwalir Khristantemi Israel kübok West Bank nung Archaeological site of Tel Shiloh semdangba noksa nung angur. Ramallah nungi kilometer 20 shi pilar aliba Shiloh nung Tel Shiloh lir aser küm shia Evangelical Khristan meyirjang aikati iba tesem semdang.


**OLONG PAITEP # 5777**

1		2		3		4	5			
				6						7
		8								
9				10		11				
			12					13		
						14				
16						17				

<b>TIPILEN</b> 1. Nisung jenti - (5) 4. Tsük rudenba - (5) 6. Temzüng tesashi - (5) 8. S _ _ _ i - (3) 9. Nisung telemsa - (3) 10. Anogoshi - (4) 12. Ajanga aor - (4) 13. Tsük rizüngdak - (3) 14. Tebang nungi adokba - (3) 16. Süngdong tatembangtiba - (5) 17. Meputep - (5)	<b>LANGTSÜNGLEN</b> 1. Tenük telong - (9) 2. Committee dang ajar - (5) 3. Yagi ki okdoker - (7) 5. Yim lenmang - (5) 7. Temoatsü keter meyipa aruba - (9) 11. Kanga junga menemba - (7) 12. Majinü - (5) 13. Tzüma nung senzüba - (5)
---	---

**OLONG PAITEP # 5776 TELANGZÜBA**

<b>TIPILEN :</b> 2. Bangsemo, 6. Tiptem, 8. Jen, 9. Talila, 11. Aren, 12. Tzübo, 14. Alia, 16. Angati, 17. Odi, 18. Azü, 19. Sünglang.	<b>LANGTSÜNGLEN :</b> 1. Yipten, 3. Nüja, 4. Sangro, 5. Milen, 7. Tulu, 10. Laza, 11. Aben, 12. Tiyong, 13. Ajizük, 14. Aitsü, 15. Tasa, 16. Aina.
---	---




**TANÜBO NAI LANGZÜANG**

Q. Koba küm TRIFED tenzük ?  
 A. 1985      B. 1986      C. 1987      D. 1988  
 \_\_\_\_\_ (Taruba adok nung onoki langzüsü)  
**YASHIADOK TELANGZÜBA:** Telangana

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Bangmet**  
 (n.)Mekümdangi jembiba atema sen achiba.  
 (fine for libelous/mindless talk)  
 \* Pai o kanga mekümdangi jembiba agi yimteni bangmet achi.

**Bangnem**  
 (n.)Shimelang ka (piece of meat)  
 \* Onok chiyongdang awazüri bangnem kaka enoktsü.



**NAI-A YA METETTER MA?**

**ALIMA NUNG TAKATIBA BILLIONAIRE 10: APRIL 2021**

1. Jeff Bezos Founder & CEO of Amazon Net worth \$177 B	6. Warren Buffett CEO of Berkshire Hathaway Net worth \$96 B
2. Elon Musk CEO & product architect of Tesla, Inc. Net worth \$151 B	7. Larry Ellison Co-founder, chairman and CTO of Oracle Corporation Net worth \$93 B
3. Bernard Arnault & family LVMH Moët Hennessy - Louis Vuitton SE Net worth \$150 B	8. Larry Page Co-founder of Google Net worth \$91.5 B
4. Bill Gates Co-founder of Microsoft Corporation Net worth \$124 B	9. Sergey Brin Co-founder of Google Net Worth \$89 B
5. Mark Zuckerberg Co-founder & Chairman of Facebook, Inc Net worth \$97 B	10. Mukesh Ambani Chairman, MD of Reliance Industries Ltd. Net Worth \$84.5 B

**SUDOKU # 5820      TELANGZÜBA # 5819**

	9	8					7	5	3	9	6	8	4	1	7	2	
6						9			6	7	1	3	9	2	5	8	4
4					3		5	8	2	4	5	1	7	6	3	9	
1	5			2	8	7	9		3	8	7	9	4	6	2	1	5
	4		3	7		1	5	6	9	1	6	8	2	5	7	4	3
	3	9			5	4			2	4	5	1	7	3	9	6	8
									4	9	2	7	6	8	3	5	1
	6	7		8		5	4		7	5	8	2	3	1	4	9	6
					4	2	1	9	1	6	3	4	5	9	8	2	7

**OJANG LUTEP # 5364**

ELTKO	:												
NNGU	:												
LAIEENBA	:												
IKBNYAA	:												
PMAANRE	:												
MMEIAANGB	:												
UTSYAÜ	:												
HONENYGKI	:												
DGAN	:												
OKTTAAKSÜM	:												

**OJANG LUTEP TELANGZÜBA # 5363**

**ALIMA NUNG SHIRI KÜMDANGA ALIR PARJISA LENDONG TIMTEM NUNGI JENBOR**

**TAN HOPTA ATEMA - KOMA SÜLA ?**

Q. Myanmar nunger nübortem par lima nung sepaitem tsübuba agi süngjema melitet, parnok meyirijang anasemka Nagaland nung khen atema tejenokdak bushia arua nunga koma süla ?

### Maharashtra tesem ajak shibangtsüa akok: Health Minister Rajesh Tope



April 09, 2021 nü Mumbai nung aliba Covid-19 vaccination centre ka nung nisungtem nokdaktepa aliba noksa nung angur. State nung vaccine agi anüంగా agi Vaccination center aika shibangogo.

**Mumbai, April 09 (Agencies):** Maharashtra nung anogo shia nisung timba-timba dak coronavirus tashidak putetba mapang nung Hokolbarnü state Health Minister, Rajesh Tope-i, tang state nung coronavirus tensa azüoktsü atema state tesem ajak hopta ana-aseem shi shibangtsü nüngdak, ta metetdaksü.

Paisa, state sorkari tang tensa ya mazüoktetra state tesem ajak shibangtsü atema telemtetba agitsüsa akümtsü, ta metetdaksü.

Health Minister-i ashiba agi, sorkari wara azüoktetba sülen temelung sür aliba agi ano wara tensa tamajungba akümer.

Tope-i, "Anogo 15 nungi hopta asem tashi state shibangtsü nüngdak, ajisiüaka

tang-tangbo ni yamaji mesüner. Hospital tem nung nisung süngadokra, mozü agi anüంగా aser sorkari tang tensa ya mazüoktetra iba telemtetbaji agitsüa akok," ta ashi.

Health infrastructure tajungba akümtsü atema state shibangtsü nüngdaker, ta pai ashi.

"Tang tenokdangbatem aliba ajanga onoki wara azüoktettsü ta ni amanger," ta paisa ashi.

State sorkari tang tensa atema tebilemtsü akar aser Centre sorkar nem yaridaksüner, ta ashi.

State sorkar dak tashimait balala aliba ajanga wara tensa tamajungba aküm, ta tai tongloktsüba dak sendakba nung pai, coronavirus case timba akümer, kechiyong state sokari kecha memimshir, ta

metetdaksü.

Sorkari wara azüoktetba sülen tenokdangba aika agienba ajanga ano iba wara tanaben proker, ta paisa ashi.

"Tang tashi nung Maharashtra-i vaccine dose crore 1.04 nguogo aser anogo shia nisung lakh 6 nem vaccine agitsütsü atema onoki hopta shia dose lakh 40 agüjang ta mepishidangogo," ta paisa metetdaksü.

Vaccine atemba agi Mumbai nung Covid-Vaccination centres 120 nungi centre 70 bo shibangogo, ta paisa shisem.

Taoba Amongnü state sorkari April 30 tashi hopta tatembanglen shia shibangtsü, aonung curfew alitsü aser anüంగా tenokdangba balala alitsü sangdonga liasü.

### Covid sülen India-Netherlands atema maongka tasen angutsü: PM Modi

**New Delhi, April 09 (Agencies):** Hokolbarnü Ato kilonser, Narendra Modi-i, alima nung coronavirus wara süiadokba sülen maongka tasen aika angutsü, aser iba mapang nungji India aser Netherlands ama linüktem tsüngda tesendaktep yanglutsü, ta ashi.

India-Netherlands Virtual Summit nung jembidang Modi-i, "Asen democracy aser ozüngtemji tamendakdak tajung. Asenoki climate change, kiralongra aser wara ama alima nung tebilemtsü onük balala atema inyakba mapatemji mesükteper. Asenoki Indo-Pacific resilient supply chains aser global digital governance ama lenla tasen nung longjemer inyaker. Asenoki tzü atema asalentong yanglua longjemer inyakba nung lenmang tasen angutsü," ta ashi.

"Alima nung coronavirus wara sülenbo maongka tasen kar angutsü, ta ni amanger, aser iba mapang nungji asenok ama linüktemi linüktem tsüngda amalitepa inyaktüsü atema tesendaktep yanglutsü," ta paisa metetdaksü.

Paisa Netherlands Ato kilonser, Mark Rutte-i kümsük

pezüben election nung takok anguba atema pa nem tenüngsang agitsüba den külemi wara mapang nung Netherlands nung pai India nung anepalua reprangba atema pelaba lemsatetp.

"Europe nung India nung nütsüng aika lir. Ajisiüaka tang coronavirus wara mapang nung nai (Mark Rutte) parnok repranga anepaluba atema ni nü dang pelar. COP26 aser India-European Union summits mapang nung maongka tasen balala atema anati jembitsü," ta Modi-i ashi.

India-Netherlands Virtual Summit nung Rutte-ia wara mapang nung India-i Netherlands nung investors yarıba atema pelaba lemsatetpa liasü.

"Tensa majungdanga asen linük ana tsüngda maneni shishilembatsü atema nenoki nungita yariogo. Asen linük ana tsüngda 'air bubble' tezüngzükteper agiba ajanga asen meyong tayimtsütem ajanga Netherlands nung aser European Union senso aika tanaben anir aruogo aser India sensotema aika India-i anir ogo," ta Rutte-i metetdakja liasü.



Ranchi, April 09, 2021: Tang India nung coronavirus wara kanga prokba mapang nung ano linük tanaben shibangtsüa akok, ta tsüba Hokolbarnü Ranchi yimti tezülen Ranchi-Kolkata National Highway (NH-33) nung aayangertem pei yimdaki meyipa aoba noksa nung angur.

### Amit Shah-i West Bengal nung rara adokdaksütsü meranger: Mamata

**Memari, Rongchii/April 09 (Agencies):** Hokolbarnü Trinamool Congress (TMC) tongti lenir aser West Bengal chief minister, Mamata Banerjee-i, Union Home minister, Amit Shah-i West Bengal nung rara adokdaksütsü meranger aser mapa tamajung inyaktüsü atema police ajungshir, ta aitsüogo.

Mamata-isa Ato kilonser, Narendra Modi dang, nai Amit Shah azüoktsüla, kechiyong pai state nung rara tulu adokdaksütsü atema ajungshitsüa akok, ta ashi.

Purba Bardhaman district kübok Mewari nung election nüboyim sentong ka nung jembidang Mamata-i, "Kü taküm nung ni kodanga nisung tamajunger aser rara adokdaksü home minister mengudang. Amit Shah ya keyi dang nungia lendong taketba. Nisungtemi pa den o jembitsü tsübur. Ni Ato kilonser Narendra Modi dang Amit Shah tama azüokang ta ashitsü. Pai yangi rara adokdaksütsü atema ajungshir," ta ashi.

Tim masüba mapatem inyaktüsü atema Amit Shah-i

police ajungshir, ta shia Mamata-i, tang state nung agiba assembly elections ya Bengal nung akhümket kümzüksü atema lir, ta ashi.

"Iba election ya nisungtem nem Bengal agi Gujarat ka mesüka kümdaksüba nokdangtsü atema lir," ta Trinamool Congress tongti, Mamata-isa metetdaksü.

Tamalen Mamata Banerjee-i, Central police-i Shah tetuyuba nung inyaker, ta aitsüba sülen Election Commission-i la nem show-cause notice agitsüogo.

### Bendangleni vaccine aika yoker saka India nungerberbo timtemer: Rahul

**New Delhi, April 09 (Agencies):** Centre sorkari bendang linük aika dangi coronavirus vaccine yokba dak sendkba nung Hokolbarnü Congress lenir, Rahul Gandhi-i, bendangleni vaccine aika yoker saka India nungerberbo lendong nung yutsür, ibaji tim asü?, ta asüngdang.

Kerala nung Wayanad nungi Lok Sabha MP, Rahul-i, coronavirus wara mapang nung linük nung vaccine agi anüంగా benjungtepba masü saka tebilemtsü tuluka lir, ta ashi.

Rahul Gandhi-isa Centre sorkar dang state tem bendangshidang mesüi state ajak dangi vaccine tali yoktsüla, ta mepishia metetdaksü.

Hindi oshi nung pai twitter ajanga, "Bendangleni vaccine yoktsü aser India nungerberbo lendongi yoktsü tim asü? Centre sorkari bendangshidang mesüi state ajak yaritsüla. Asenok ajak

longjemer iba wara anema raratsüla aser iba tongbang takok angutsüla," ta ashi.

Rahul Gandhi-i shidi ajanga Ato kilonser Narendra Modi dang vaccine agi anüంగా metetdaksüba sülen Union minister, Ravi Shankar Prasad-i, Congress-i yimsüsüba state tem nung vaccine agi masü saka temelungtetba agi anüంగా, ta aija liasü.

Tang state kari vaccine tali yoktsü mepishir aser Congress-i nisung ajak nem vaccine agitsütsü akhanger ajisiüaka Centre sorkaribo, vaccine nung ajemdaker state kari politics asayar, ta aitsür.

Hokolbarnü Union Health Minister, Harsh Vardhan-i, tang tashi nung linük nung vaccine dose crore 9.1 amshio, crore 2.4 rizünga lir aser crore 1.9 angutsü lir, anungji state tem atema ibaji teperi asütsü, ta metetdaksüogo.



Karad (Maharashtra), April 09, 2021: Hokolbarnü Karad nung aliba leper ka nung kinüngertermi coronavirus tashidak agi asür ka remtsütsü lia tangokba noksa nung angur.



Tel Aviv, Israel nung nübortem Holocaust nung asürtem bilemteta minute ana aküm tetushi agütsüba noksa nung angur. Holocaust bilemtetba anogo ya Israel calendar nung kanga tongtibang anogo ka, aser iba anogo restaurant aser südoksünema kazüba tesemtem ajak shibanger aser radio aser TV sentongtem ajak Holocaust documentaries aser Holocaust ajangshirtem den sensaksem akaba dak rangloker agir.

### Bhutan aser China arrtsü ken o sensak asemtsü

**Kunming, Rongchii/April 9 (Agencies):** Bhutan aser China nati arrtsü dak sendakba nung sensaksem 25buba agitsü asoshi telemtetba agiogo, koba küm pongu tejakdang tesüsa agiogo. Beijing-i India kübok Arunachal Pradesh state nung anüdoklen aliba tesem kar parnok meyong ta ashiba mapang ka nung tang iba telemtetba agiogo.

Bhutan-China arrtsü ken o nung 10buba expert group meeting (EGM) amenba mapang iba telemtetba agi. Iba senden ya Kunming nung April 6 nungi 9 nü tashi menogo, ta linük ana yagi külem sangdong ka ajanga Hokolbarnü metetdaksü.

India aser China na Ladakh sector nung mangatetep adoker aliba mapang iba senden menogo. Mangatetep adoker aliba tialong nung China-i taoba küm July ita Bhutan den anüdoklen aliba sector nung arrtsü dak sendakba nung mangatetep lir ta ashi. Iba tesem ya Arunachal Pradesh den arrtsü nung lir aser Beijing-i parnok meyong ta ashir.

Bhutan aser China na külem sangdong ajanga ashiba agi, "linük anapronglai 25buba Bhutan-China arrtsü sensaksem akatsü aser linük anapronglai mulungtepba mapang ka nung 11buba EGM takaratiba nung agitsü telemtetba agiogo."

EGM nung Bhutan-China arrtsü sensaksem takaratiba nung tenzükshitsü atema sentong yanglutsü sensaksema liasü, ta kasa sangdong ajanga metetdaksü.

1984 nungi 2016 küm tashi nung Bhutan aser China nati arrtsü nung mangatetep aliba bentettsü atema senden 24 ben menogo, aser Bhutan parliament aser tanga public record ajanga iba senden nung anüolen aser central section kübok arrtsü nung

mangatetep aliba indang dang sensak sema aruba sayuogo.

China-i, anüdoklen Bhutan litsü parnok meyong ta ashi asü masü iba indang osang tejangjabo memetet.

Taoba küm June ita Washington-based Global Environment Facility (GEF) virtual senden nung China-i Bhutan anüdoklen Trashigang district nung Sakteng wildlife sanctuary amenoktsü atema mepeshiba magizük. Bhutan anüdoklen aliba iba sanctuary yagi ali 650 sq km ayimjemer.

"Linük anapronglai arrtsü nung mangatetep adoker aliba tesemtem ken o mebentet tashi yimjung nung toktsütsü atema mulungtepogo," ta kasa sangdong ajanga metetdaksü.

Bhutan aser China na tesendaktep temulung dang yur EGM senden tangatetep nung menogo aser arrtsü ken o kanga takok ngua sensaksemogo, ta linük ana külem sangdong ajanga metetdaksü.

Bhutan aser China na arrtsü dak sendakba nung ken o 1984 küm nung jembishinü tenzük aser linük ana yagi 1988 küm "Guiding

Principles on the Settlement of the Boundary Issues" aser 1998 küm "Agreement on Maintenance of Peace and Tranquillity" nung sign süa liasü.

"Iba tenanzüktepba ana ya Bhutan aser China arrtsü ken o sensaksem tamendakdak lir," ta parnoki ashi.

EGM nung Bhutan nungi secretary of international boundaries Letho Tobdhen Tangbi-i anir shilem agi aser kasa mapang nung China foreign ministry kübok director general of the department of boundary and ocean affairs, Hong Liang lenisüba kübok China nung ketdangsertem shilem agia liasü.

Hong lenisüba nung tawa China nung ketdangsertem arrtsü dak sendakba nung India-China Working Mechanism for Consultation and Coordination (WMCC) nung shilem agia arudar.

Tesendaktep aser temabar asüba temaitsü China sorkari Covid-19 wara den rara dang amshitsü atema Bhutan nem personal protective equipment aser medical supply tem tenla agüja liasü.

### Assam 2021: Congress-i anir... (Tapak 1 nungi...)

Congress-i parnok amongba nung sen endokba ajak menoktsü. Centre nung BJP ali tashi MLA tem alizükba maparen inyaktsü" ta Rajasthan Assembly nung Congress indang chief whip, Mahesh Joshi-ia metetdaksü.

"Onoki Assam nung dang Chhattisgarh nung onok nem takok tulu ngudaktsüba ama maangka agütsütsü ayongzük. Yamaji asü nung dang BJP mesüra tangar shingaiia candidate tem mesüzüka anir moutettsü. Onoki menden 101 aginür" ta Congress

national general secretary, Randeep Singh Sujerwala-i nüboyimba mapang ashi.

"Democracy linük ka nung nübortem vote enoktsüba akhümtsübuttsüla. Ajisüaka, nübori shimtetba sorkar ka loksaktsütsü merangbaji magizüker" ta paisa metetdaksüogo.

Külen, Assam Pradesh Congress Committee (APCC) president Ripun Bora-i taküm assembly election nung Congress-i aniba teloktepi menden 90 tema nung takok angütsü inlar ta shiogo.



West Belfast, Northern Ireland kübok Shankill lenmang nung ronger aliba bus ka adena nisung ka aoba noksa nung angur. Loyalist tesem nung mangatetep adokba sülen iba tesem mesungjemteti lir.

### Nepal nung morok mi lendong tulu ataloker lir

**Kathmandu, Rongchii/Arpil 9 (Agencies):** Kümtem tsüingda Nepal nung tang morok mi lendong tesashitba ataloker lir, ta ketdangsürtemi Hokolbarnü ashi. Iba ajanga linük yimtiba Kathmandu nung mopung kanga menena kümogo.

Mi temseptsü merangba mapang tang tashi nung nisung pongubo süadokogo, koba January ita nungi tanenmakai rongdar, ta National Disaster Risk Reduction and Management Authority nung ketdangsür Sundar Sharma-i ashi.

Nepal kübok administrative districts 77 nungi 22 nung tesem 60 nung arem rongdar, ta pai ashiba den India aser China na tsüingda aliba linük nung mopung jenjang kanga mejungi kümogo, ta ashi.

Morok mi ajanga teraksatsüba bener arutsüba indang osang tejangja bendena mali, ta Sharma-i ashi. 2012 küm sülen tang morok mi lendong tuluba ataloker lir.

"Kathmandu aser tanga tesemtem mopung menena akümba kuli tulutibaji rem

arongba ya lir," ta Sharma-i Reuters dang ashi.

March tatemi mopung kanga meneni akümba sülen Nepal nung school tem anogo pezü shibanga atatsü tetuyuba agütsü aser iba ajanga kaketshirtem aika pei ki toktsür maotsüsa aküm.

Nepal nung January nungi May tashi nung mapangshia morok mi adoker. Aluyimertemi parnok kiset shirururtem atema rem lanu adokdaksütsü asoshi arem nung süngotu takok rongtokba mapa aiben morok odaktsür.

Sharma-i ashiba agi, 2020 küm morok aoba dang nungi taküm 15 ben agi tamajungba morok odar.

Kathmandu nung Hokolbarnü air quality index (AQI) level 174 nung lir, ta iqair.com data ajanga sayuogo. AQI level 50 tekübok ya tajung ta züngshir.

"Tesem aika nung mopung menener aliba tajungba kümogo, saka tangola sashitsü atema teperi masü," ta Department of Environment otongdar Indu Bikram Joshi-i ashi.

### South Korea nung nightclub, karaoke bar shibangtsü tuyu

**Seoul, Rongchii/April 9 (Agencies):** South Korea nung nightclub, karaoke bar aser aonung inyaksangshiba tanga entertainment facility tem tanaben shibangshitsü, ta ketdangsürtemi Hokolbarnü ashi. Coronavirus tashidak keta alir timba küma aoba ajanga wara ano asendenshir pezübenbuba poktetshitsü ta tsübuwa bilemba ajanga iba jenjang agir.

Hopta tsüingda tashidak menar tali akümba sülen Ato Kilonser Chung Sye-kyun-i, tenokdangba agütsüba indang metetdaksü, koba Hombarnü nungi tenzüka hopta asem benoktsü. Tang aonung 10 ako sülen chiajemdak melapoktsü aser nisung pezü dak tema adenshitsü atema tenokdangba agütsür aliba maneni benoka inyaksangshitsü, ta pai ashi.

"Wara wave pezübuba agi meneptsü temaitsü tesashiba küma odar. Tang lokti nung tetsüingda ita inyaksangshitsü benoka aliba maneni benokshitsü aser tensa apir jenjang tapet agitsü," ta Chung-i ashi.

Korea Disease Control and Prevention Agency (KDCA)-i, Bodhbarnü January ita nungi tang tashi nung anogo ka nung nisung timtiba dak tashidak potetba sangdongba sülen Brehostibarnü linük nung nisung 671 dak tashidak potetba metetdaksüogo. Tashidak ya tekülemdak, bar aser gym tem nungi timba menatepyonga aoer.

Korea nung tang tashi nung nisung 108,269 dak tashidak potetogo aser nisung 108,269 süogo.

### Queen Elizabeth II kinungbo... (Tapak 1 nungi...)

Prince Philip aser Queen Elizabeth na nem tanur 4 moatsü. 1948 küm Prince Charles, 1950 nung Princess Anne, 1960 nung Prince Andrew aser 1964 nung Prince Edward aso.

Pai semchir 8 aser tanabuba semchir 10 toktsür alima nungi pilaogo.

Prince Philip asüba osang angashiba sülen nisungtemi Buckingham Palace kima nung naro yuja tetushi agütsü aser nisung aikati Windsor Castle semdanga akhümtsüba agütsü. Ajisüaka, British sorkari coronavirus wara nung

ajemdaker nübortem dang lokti madenshitsü mepishia metetdaksüogo.

Prince Philip den asüpila sentep sentongji St George's Chapel, Windsor nung alitsü saka coronavirus wara nung ajemdaker inyakyim kar melenshiogo, ta College of Arms-i tanü sangdong ka nung metetdaksüogo.

Duke of Edinburgh den asüpila sentongji state funeral masütsü. Asüpila sentep magidang pa indang mangji Windsor Castle nung dang ayutsü aser iba ya pai aginüba ama lir, ta College of Arms-isa ashi.



## Tuensang & Kiphire DPDP senden agiogo



Tuensang, Rongchii/April 09, 2021: Brestibarnü DC Conference Hall nung Tuensang District Planning and Development Board (DPDB) senden agiba yangi angur.

**Tuensang, Rongchii/April 09, 2021 (TYO):** Brestibarnü (08.04.2021) DC Conference Hall nung Tuensang District Planning and Development Board (DPDB) senden agiogo. Iba senden nung DC aser Vice Chairman DPDB Tuensang, Kumar Ramnikant, IAS menden liasü.

Iba senden nung DPDB züngsemtemi, Sotokur EAC administrative circle nungi Chingmelen, Helipong aser Sipongsang yimtsüngtem Tuensang District administrative circle-i belentsü onük nung olemtep aser iba ya mapa küma inyaksü atema sorkar dangi benoktsü teletetba agi.

Aspirational Block Chessore atema CMO, EE (R&B), EE (Power), DAO (Agri), DHO (Horti), District Soil Conservation Officer, PD Land Resource, DEO(Education), DFO(Forest), PD RD, DWO aser President YTC densema District Level Committee tentettsüogo.

Mount Sinai School Longkhim nung class V nungi class VIII tashi bendenloktsü, Imlong Theological College Campus tsünga lenmang tajungba yanglushitsü aser GHSS Thangjam nung badminton court yanglutsü asoshi senotsü teyari agütsütsü asoshi board olemtepogo.

Iba den külemi, Chessore yimtsüng nung Grace Ministry Welfare Society indang registration atema mapatong nung sensaksem aser iba Society register asütsü asoshi sorkar dangi yoktsü telok bangjemtep.

Board-isa iba senden nung State Bank of India indang General Manager jaok aser district nung bank maparen tsütsü nüburtem mepetmesü/ timtem ajuruba aser akok tashi service tajungtiba agütsütsü asoshi olemtepa liasü.

Mokokchung aser Tuensang tsünga teinyakdak aliba maparen atema sensaksem agütsü asoshi, iba senden nungsa NHIDCL nungi

teshimtet nübutem jaok.

NHIDCL nungi teshimtet nübutemi maparen dak sendakbatem tejangja metetdaksü aser iba mapa tajungtiba nung inyaka aotsü asoshi board aser parnok tsünga olemtepogo.

Latetsüba mapang tsünga maparen renemtsü aser tajungtiba nung inyaksü asoshi NHIDCL dang board-i tetuyuba agütsü.

Maneni, kasa senden nung District Welfare Officer-i PowerPoint ajanga Departmental inyakyimtem metetpeladaksü, ta sangdong nung shia lir.

**Kiphire :** Brestibarnü (08.04.2021) DC Conference Hall nung Kiphire District Planning & Development Board senden agiogo. Iba senden nung Deputy Commissioner & Vice-chairman DPDB, T. Wati Aier menden liasü, ta sangdong ka ajanga metetdaksü.

Iba senden agiba mapang, Sangphure tesem nung Carpentry Training Institute amenoktsü asoshi teloki asangshia jembi aser iba reju dak sendakba maparen inyaksü asoshi tekolakpur dangi abentsü telok bangjemtep.

Taruba DPDB senden nung Power Department dang PowerPoint presentation agütsütsü asoshi metetdaksüogo.

Maneni, iba senden nung ketdangsürtem, PD, DRDA Kiphire, Taliyanger aser RCS (ARCS), K. Liricham Anar nung board nung züngokogo, ta kasa sangdong nung shia lir.

## LRD Director-i Zunheboto semdang

**Kiphire, Rongchii/April 09, 2021 (TYO):** Zunheboto District kübok yimtsüng balala nung teinyakdak aliba project tem repringshimtsü mechi April 05 aser 06 nü Director of Land Resources Department, Renben Jami den Directorate ketdangsürtemi item yimtsüng semdangogo, ta sangdong ajanga metetdaksü.

Team-i Ustomi, Natha Old, Surumi, Satami, Lukikhe, Khrimto, Rotomi aser Philimi yimtsüng tem semdanga liasü.

Item yimtsüng semdangba mapang, Renben-i, project balala takok ngua inyaktetsü asoshi Department den amalitepa aotsü aser nungitsü asoshi yimertem ayongzük.

Lemzüksüba project balala takok ngua amenoktsü asoshi Department-i akok tashi yimertem nem teyari agütsütsü, ta pai ashi.

Tzü kümdanga amshitsü aser tzü bendena ayutsü indang tongtibang nung pai jembia liasü. Coffee project tem dak

sendakba nung, Director-i ashiba agi, aluyimertem atema training tajung agütsütsü Department asalentong yangludar aser kati ka ajungshitepa nendak nendaka inyaksü asoshi pai ajungshiogo.

Maneni, Director Renben den Deputy Director, LRD, Hekato Yeptho; SPC SLNA Cell, Inatoli Chishi aser technical staff, SLNA nung dena liasü, ta kasa sangdong nung shia lir.

## AR aser Army longjemer medical camp ayongzük

**Dimapur, Rongchii/April 09, 2021 (TYO):** Op Sadhbhavana Project shilem ama, Hokolbarnü (09.04.2021) Pungro Town, Kiphire District nung HQ IGAR (N) kübok Assam Rifles indang Kiphire Battalion-i veterinary aser medical checkup camp ayongzük, ta sangdong ka ajanga metetdaksü.

Mobile Field Veterinary

hospital, Rangapahar aser Pungro PHC nungi Vet Doctor & Medical Staff den longjemer iba camp ayongzük liasü.

Kiphire District kübok temeküt yimtsüngtem aser Pungro arrtsülen aliba yimtsüng tem nungi camp nung denogo. An 1073 aser kiset shiruru 252 atema mozütem lema agütsü. Iba den külemi, azü (dog) 15 aser an 190 shi

tashidak balala atema anepaluogo.

Shiruru anepaluba dak alaka, yimer 37 tashi temang anepalua aser parnok timtem den apet mozütem agütsü. Tang ama mapang, nübur nungdakba ajiteta teyari agütsüba maparen yimertemi pelashishia agizük aser parnoki Assam Rifles den Indian Army danga pelaba metetdaksüogo.


## Late PURKUMZUK (Wameken) sür küm 63 ajunger



Temeim Oba, na alima nung taküm alitang ni majitet, kuno mangu. Saka temeim ojala ami ki nung Teyanglur Tsüngrem taochi tulu ajanga inteta lia arudang na onok nungi pilar tanü küm 63 ajungba anogo menungraa bilemteter. Aser onok molungjang nungi kodanga mamatoker.

- Jala, Jabaso, Mezüng Semchirtem, Tanabuba Semchirtem aser kinungertem.

## TEPELA TASOBA ANOGO



Obang Ozüküm  
April 10, 2021.

Tsüngremi moatsüba tesüngmangtsü tsürabur tajung, na sor tanü küm 90 ajungba Tepela Tasoba Anogo salem agütsür. Iba ama takok anogo ka nung nü den külemi pelatep dang, nai kibong khuret ajunga tongzuka onok yaria aruba bilemteta nü dang kanga pelar. Nü shisatsü den temetetba tulu aser tajangshiba aika nü dak aliba ajanga onok ajak taküm lenmang aika nung kanga ajangzükogo. Anogo shia arishi tasen nung nü taküm tepela nung aodang, Kibubai nü mapatem moajang aser nü taküm tashi itshidakja maneni Pa taochi nü den liangma ta onoki sarasademtsür.

Onoki na teti meimer.

- Temeim kinungtsü, chirnur, anük-apang aser semchirsemnurtem

## OFFICE OF THE AKHOYA LAISHIR TELONGJEM

### TENÜNGSANG AGÜTSÜR

Clark Theological College nung Rev.Dr.A.Temjen Jamir, principal menden tashi tongtetba asoshi Akhoya Laishir Telongjem kanga pelar aser Tsüngrem tenüng asanger. Temaba jenjang nung kanga ajemalua ochi nangri kanger Tsüngrem aser nisung tenzüktsü taküm aser mapang tajung moajangni ta sarasademtsür. Amen.

Sd/-  
Dr.ONEN JAMIR  
President.

Sd/-  
TAKUSENLA  
General Secretary.

## KOHIMA NUNG AORTEM ATEMA

Kohima - Mokokchung Highway nung, New High Court junction ( Meriema) nungi tatsüka pilar ali kimong tajung kar wazüka lir. Anungji, Kohima nung Aortem kari alinüra jenjang kanga dalang agi angutsü.

Contact : 600 970 5748.

## 2buba State Level Sobaliba saisapong tembangogo



Kohima, Rongchii/April 09, 2021: Hokolbarnü, IG Stadium, Kohima kübok 2buba State level Indigenous Games Competition shibangba sentong nung, Director YRS, Akumla Chuba-i telok den jembiba yangi angur.

**Kohima, Rongchii/April 09, 2021 (TYO):** Hokolbarnü (09.04.2021), IG Stadium, Kohima nung 2buba State level Indigenous Games Competition shibangba sentong nung Director, Youth Resources & Sports, Akumla Chuba, NCS alakteta tejaoker ama aruagi denogo, ta sangdong ajanga metetdaksü.

2buba State level Indigenous Games Competition takok ngua tembangba atema, sentong nung, Akumla-i pelaba metetdaksü.

Lai ashiba agi, saisapongtem ya Naga nung sobaliba shilem ka lir aser akhi tetsü tebou mapang nungi sobaliba saisapongtem asaya aru.

Sobaliba saisapongtem nung tetoktepba tanela kisüing agi masü, saka pei temang nunga teyari agütsütsüsa asayar kati shilem agiba den Naga nung tsüingda iba saisapong ajanga sobaliba tsütsü tesendaktep tajung ayutsüla, ta lai ajungshia liasü.

Iba saisapong tetoktepba nung tebur temi dang masü saka tetsütem densema tetsür telok

balalai tejangraba tulu nung shilem agiba ngua lai telok dang pelaba shisem.

Iba asayamung takok ngua agitsüsa jangrabangra meranga inyakba atema sentong achaayanger aser shilem agir ajak dang lai pelaba metetdaksü.

Anogo ana tashi ayonga asayaba asayamung nung district 11 nungi nisung 209 agi sobaliba asaya talisa cock fight, stilt bamboo race, greased bamboo pole climbing aser arr-atsütepba nung shilem agiogo, ta kasa sangdong ajanga metetdaksü.

## Bangladesh nung Asian Champions Trophy hockey ayongzüksü

**Kuala Lumpur, Rongchii/April 09, 2021 (Agencies):** Alima ajunga asüingba coronavirus wara ajanga aiben anogo atsülangja arur sülen, tebur indang Asian Champions Trophy hockey asayamung October 01 nungi 09, 2021 tashi Dhaka nung asayatsü, ta Asian Hockey Federation (AHF) sangdong ka ajanga metetdaksü.

Covid-19 wara süshia maoba ajanga tebur aser tetsür atema Asian Champions Trophy anaben tashi anogo atsülangja aru.

"Coronavirus tenokdangba ajanga alima tesem ajunga nung saisapongtem anenja arur sülen, hockey asaya tanaben tenzüksütsü temlungtetba tulu

nung iba asayamung ayongtsü renema lir. Taküm October ita tetenzüklen Hero Men's Asian Champions Trophy 2021 asayamung asayatsü maongka ngua asaya anogotem pelashishia sangdonger," ta AHF chief executive Tayyab Ikram-i ashi.

Tebur indang ACT asayamung atema Bangladesh Hockey Federation den jembitepogo aser iba asayamung ayongtsü asoshi International Hockey Federation (FIH) ajanga temelaba agütsüogo," ta AHF-i ashi.

Küm ana nung khen ayongba asayamung trokbuba ya Dhaka kübok Maulana Bhashani National Hockey

Stadium nung asayatsü terenemba lir. Iba asayamung nung team trok - Japan, India, Pakistan, Korea, Malaysia aser Bangladesh nungeri shilem agitsü.

Tebur hockey asayamung ya Dhaka nung March 11 nungi 19, 2021 aser tetsür asayamung Donghae, South Korea nung March 31 nungi April 6, 2021 tashi asayatsü renemer liasü.

Mezüngbo, asayamung anaprongla taoba küm asayatsü renem, saka wara tesashi aliba ajanga iba asayamung anogo atsülangtsü. Iba sülen, taoba küm tatemlen, tebur asayamung November 17 nungi 27 aser tetsür asayamung June 14 nungi 21 tashi asayatsü renem.



Dimapur, Rongchii/April 09, 2021: Assam Rifles Civic Action Project mapatong shilem ama, Hokolbarnü (09.04.2021) HQ IGAR(N) kübok Assam Rifles indang Mokochung Battalion-i Aboi Student Union, Aboi Town, Mon District, Nagaland nem saisapong oset balala lema agütsüogo. Saisapong jangrartem ajungmesotsü aser parnok sempet tajungtiba nung amshitsü asoshi maongka agütsütsü nükjidong nung Assam Rifles-i item saisapong osettem lema agütsü. Saisapong tsütsü lanurtem ajungmesotsü tebilemba nung iba ama tenla tajung agütsüba asoshi Aboi Student Union-i Assam Rifles dang pelaba metetdaksü.

## CSK nung Jason Behrendorff denogo

**New Delhi, Rongchii/April 09, 2021 (Agencies):** IPL 2021 asayamung, koba Hokolbar aonung nungi Chennai yimti nung asaya tenzükogo, iba league atema Chennai Super Kings (CSK) puri Josh Hazlewood melena Australia nung fast bowler Jason Behrendorff aniokogo.

CSK nung Jason aniokba osang ya IPL sangdong ajanga jangjatsü. Külem Australia nung fast bowler Josh Hazlewood bio bubble nung adentsü mejangraba ajanga iba asayamung nungi pa tukadok.

"VIVO Indian Premier League (IPL) 2021 atema Josh Hazlewood melen Chennai Super Kings-i Jason Behrendorff aniok. Left-arm fast bowler Josh-i ODIs 11 aser T20Is 7 tashi asaya lir. Tan asayamung nung Behrendorff-i tanabuba IPL team nung adener alitsü. 2019 küm Mumbai Indians tenüing nungi pa asayaogo, kong asaya pungo nung shilem agia liasü," ta IPL sangdong ajanga metetdaksü.

Tanü tashi nung, Jason Behrendorff-i T20 match 79 asayaogo aser item asaya nungi pai wicket 90 agiogo. Honibarnü CSK-i Delhi Capitals (DC) team den mezüing asayatsü terenemba lir.

IPL 2020 asayatsü aliba tejakdang, asemben tashi IPL

takok angur telok CSK-i sen cr. 2 yong Josh Hazlewood alizüka liasü. Taoba küm 13buba IPL atema Josh UAE-i ao aser 'Yellow Army' (CSK) tenüing nung pai match asem asayatsüogo.

Ajisüaka, Delhi Capitals den CSK indang mezüing match asayatsü anogo 9 aliba tejakdang iba league nungi pa tukadok.

"Mapang balala nung ita 10 tashi bubble aser quarantine nung munga aruogo. Ajiasünung, cricket asaya nungi khen anisüingzüka aser taruba ita ana tashi kidang adianutem den külemi amungtsü telemtetba agiogo," ta Hazlewood-i ashi.

"Taküm asükwa mongpu mapang asayamung tulu anüingdaka lir. West Indies Tour ya talangka asütsü aser ibaji temli dang Bangladesh (T20 tour) tenzüksü. T20 World Cup sülen ano Ashes asayatsü asünung, ita 12 ya kanga tongtibang lir. Ni Australia tenüing nungi asayar asünung, item asayamung atema tajungtiba renemshia ataner. Ibayongji, IPL nung masayatsü telemtetba agi aser aji tajungtiba atema lir," ta Josh-i shisem.

Maneni, IPL 2021 nung Josh Philippe (RCB) aser Mitchell Marsh (SRH) nati shilem magitsü lemtetba sülen, IPL nungi tukadoker Australia nung rongnung Hazlewood tasembuba alitsü.

## Tokyo nung Covid-19 meratem akangshir

**Tokyo, Rongchii/April 09, 2021 (Agencies):** Olympics asayamung tenzüksü aliba ita asem tejakdang, coronavirus wara prokba azüoktsü asoshi, Hokolbarnü Japan-i Tokyo nung Covid-19 meratem akangshitsü asoshi sangdongogo.

Sorkar panel nung mongintemi iba wara dak sendakba nung tekümdangtsü meratem akangshitsü asoshi temelaba agütsüogo. Iba talenba (Covid-19 meratem) kübok Tokyo, Anüolen Japan nung Kyoto aser Okinawa indang Anüolen tip tzü mekütli densema lir.

Hokolbarnü, Japan Ato Kilonser, Yoshihide Suga ajanga Covid-19 atema sangdongba meratem Hombar nungi tenzüksü aser May ita tetenzük tashi item meratem nung nüburttem anidaksü. Ato Kilonser, Suga sangdong nung anidaka Tokyo indang Angh-i bar aser restaurant tem lapoktsü asoshi mapang tatakük (taoba dang nungi mapang tatsüba) latettsütsü. Iba den külemi, temzüing nung aibelenertem senchi achitsü aser ozüing nung anidaker tem nem temenok agütsütsü. Hombarnü nungi item meratem mapa küma inyaktü aser May 11, 2021 tashi anidaksü.

Tokyo nung 'state of emergency' agienba sülen hopta asem majungdang item mera amenoker alitsü.

Brehostibarnü, Tokyo Angh,

Yuriko Koike-i, nüburttem dang nüngdak melira ainlen senzüsönong masütsü, lokti nungi pilar alitsü aser Covid-19 dak sendakba tongtibang meratem nung anidaksü asoshi metetdakja liasü. Laisa, aonung 8:00 ako sülen Tokyo nung bar aser restaurant tem shibangtsü asoshi tetuyuba agütsütsü imlar.

Osaka nunga mozüki balala nung Covid-19 wara tasen putetba osang angazükba sülen, iba yimti nung medical emergency sangdongogo aser taruba hopta Olympics torch relay sentong asoshi iba tesem nung public road tem paidoktsü lemtet.

Tang, Japan nung vaccination drive tagidak (tenzükler tatsüka dang) aser nisung million 1 dak tema mesüra nütüing yongsük shilem 1% agi dang iba vaccine agia lir. Covid-19 tensa mejungi kümra, Olympics dak sendakba sentong tem thitsütsü mesüra tanga tesem (Japan telungtet nung) agi melentsü akok.

Japan nung Covid-19 vaccination drive sentong February tom ka nungi tenzük aser iba mapang medical nung inyakertem nem mezüing vaccine agütsü. Taruba hopta nungi tenzük June ita tatem tashi tantsü-tambu nem Covid-19 vaccine agütsütsü renema lir.

Maneni, Japan nung tanüingba nütüing yongsük tem vaccine agitsü atema July ita tashi atatsüsa akümtsü akok.

## BILEMDANGANG

"Mapang nem na tanishidaksü; nai mapang amshia."